

# **REV. LALHMINCHHUANGA ZONGTE**

## **FIELD DIRECTOR, NORTH INDIA MISSION (DELHI)**



**1966 - 2021**

*"A mi thianghlime thihna chu LALPA ngaih chuan hlu tak a ni."*

## A CHANCHIN TLANGPUI

Rev Lalhmingchhuanga Zongte hi Upa Siamhleia (L) leh Pi Zaichhingi (L) te inkarah 1<sup>st</sup>. July.1966 khan Hmawngchuan khua, Zampui Tlangdung, North Tripura ah a lo piang a. Kum 1982, January 15 ah Hmawngchuan khua ah Pastor Lalthuama'n ringtu Baptisma a chantir a. An Unau hi an rual a, mipa 6(paruk) leh Hmeichhia 4(pali) niin Rev Lalhmingchhuanga Zongte hi a naupang ber dawttu a ni.



## AN UNAU INDAWT DAN CHU HETIANG HI A NI.

1. Vanlalvuli (L) w/o Upa HC Lalrinmawia (L) Hmawngchuan, Tripura
2. Lalbiakhnuni w/o Laltanpuia Khiangte Hmawngchuan, Tripura
3. Rothangluaia h/o Zasangluri Mamit, Mizoram
4. Zarzoliana h/o Lalrammawii Vanghmun, Tripura
5. Kamdingliana(L) h/o Weldenmawii Hmawngchuan, Tripura
6. Tlangthanmawia h/o Lalsangpuii Hmawngchuan, Tripura
7. J.Lalthakima h/o Biaknghilhlovi Hmawngchuan, Tripura
8. Nuntharmawii Jongte w/o Rev James Thansanga Hlychho Bishramganj, Tripura
9. **Lalhmingchhuanga Zongte** h/o **Malsawmdawngliani** **Delhi**
10. Malsawmkimi Jongte w/o Rev Laltanpuia Colney Serchhip, Mizoram

## **ZIRNA LEH CHHUNGKUA**

Primary School hi Hmawngchuan Basic School ah kalin, Middle School hi Hmawngchuan Junior School ah a kal leh a, 1985 kumah Jampui High School atangin HSLC a zo a. Kum 1989 ah St Edmunds College Shillong atangin PUC a zova, 1993 ah he College atang tho hian B.A (Hons) a zova, NEHU Shillong atangin 1995 khan M.A (Sociology) a zir zo leh a ni.

January 12.1995 ah Hmawngchuan Baptist Kohhran Biakin ah Kohhran Dan Puitling in Pu Lalmuana(L) leh Pi Lalramengi Hmar te fanu Malsawmdawngliani, Shillong, Meghalaya nen an Innei a, Pastor Lalthuama'n a in vawn tir a ni. Fanau malsawmna changin Fanu 2 leh fapa 1 an nei a, chungte chu- Esther Lalhruaitluangi Zongte, Ruth Lalremruati Zongte leh Joshua Remruatfela Zongte te an ni.



## RAWNGBAWLNA

Rev Lalhmingchhuanga hian mite angin pianthar dan leh pianthar lai hun sawitur a nei lova “*Chumi khami hunah ka piangthar tih sawi tur ka neilo. Ka tet te atanga ka nu leh pa min zirtirna atang hian Lal Isua hi ka ring nghet em em mai ani*” a ti. A tlangval chhoh a tangin Kohhran ah a hun tam zawk a hmang a, 1986 ah Hmawngchuan Kohhran TKP Unit Secretary a ni a. 1987 atangin Shillong-ah lehkha a zir chhunzawm a, Shillong TKP-ah inhmang chhunzawm zel in hruaitu dinhmun pawh tum engemawzat lo chelh tawh a ni a. 1988-1989 ah Shillong Kohhran TKP Unit ah President a ni a, 1989-1995 inkarah ZPMBK TKP Bial President te a lo ni tawh bawk a ni. M.A a zir zawh hma hian a Pa hnenah “*Fulltime a rawngbawl tur hian Lalpan min duh a, M.A ka zawh chuan Pathian thu (Theology) ka zir i remti em?*” a ti a, a Nu leh Pa chuan “*Fa sawm(10) zinga Lalpa rawngbawl tur a kan serh hran i ni a lawm*” tiin an lo rem ti hle mai a, Chutia an remtih hnu ah Shillong Kohhran kaltlangin Pathian thu zir turin a chhuak ta a ni. 1996 -2000 chhungin Union Biblical Seminary Pune ah B.D a zir a, hemi hun chhung hian Pune Mizo Christian Fellowship (PMCF) ah Chairman term hnih a chelh hman a ni.

B.D a zir zawh hian Mizoram Baptist Kohhran hnuai ah Pastor atan a lak a ni. Thil chhinchhiah tlak tak leh ropui tak chu, hetia rawngbawlna a ke a pen tan dawn tak tak ah hian a nupui Pi Malsawmdawngliani hian a pasal rawngbawlna tibuai tu nih hlauvin hlauh tha tak nei a hna a lo thawhve Assam Regiment Center Record office a LDC hna chu a bansan a ni. Pastor-a lak a nih hnu hian Probationary Pastor in Lengpui Pastor Bial (2000-2002) leh Saitual Pastor Bial, Seling (2002-2004)-ah te a awm a. BCM Assembly 2004, Ramhlun ‘N’ Kohhran Aizawl-a neih ah Rev.C.Rothuama’n a nemnghet (ordained) a. Nemngheh a nih hnu hian Lunglawn Pastor Bial (2004 – 2005) leh S.Vanlaiphai Pastor Bial (2005 - 2006) ah te Pastor a ni a, 2006-ah MTh. Zir tura tirh a nil eh ta a ni.



Kum 2006 – 2008 chhung in UTC Bangalore ah M.Th (Counselling) a zir leh a, Bangalore-a a awm chhung hi rei lovin kum 2 chauh ni mahse, hemi chhung pawh hian Bangalore Mizo Christian Fellowship (BMCF) leh Bangalore Mizo Association (BMA) ah a tangkai hle a, BMA Annual Magazine leh BMCF Weekly Newsletter (KOINONIA) ah te a awm chhung hian Editor ni in thuziak lamah Sulhnu pawimawh tak tak a hnutchhiah hman a ni. M.Th a zawh hnu hian Academy of Integrated Christian Studies (AICS), Tanhril Aizawl ah 2008 (June) atangin Lecturer atana dah a ni a. AICS-a kum 5 a zirtir hnu in, 2013 kumah D.Th (Counselling) zir turin FFRRC, Kottayam, Kerala ah a liam leh a, hetah hian kum 3 a insawrbing hnu in, 2016 ah North India Mission, New Delhi-ah a zirna chhonzawm chung zel in Field Director atana dah a ni a, a boral thleng hian North India Mission Field, New Delhi ah Field Director hna hi a chelh a ni. Delhi an awm chhung hian 2017-2018 ah Delhi Mizo Inkhawm (DMI) Vice Chairman a ni a, 2018-2020 chhungin term hnih lai mai DMI Chairman a ni baw. ***Hebrai Bung 12 thu hi a dam hun chhung a a nun kaihruai tu leh khalh ngil fo tu a ni.***

DTh. a zirna lamah hian a tluang ta lo deuhva, a Thesis hi inzial fel in, a submit hman chiaah a, tunah hian a result a nghak mek a ni. Reilote ah hian a result tha tak kan beisei a, mahse a Viva Voce examination ti turin he khawvel ah a awm ve ta lo a ni.

### **A NUNGCHANG LEH MIZIA.**

Rev Lalhmingchhuanga hi naupan tet atanga Nu leh pa thu awih em em a ni a, a tleirawl chhuah hun lai pawhin a Nu in lengchhuak lo tur a tih chuan I he lovin In ah a awm a, a farnu te kiangah awmin an inkawm ho thin a ni. Amah hi pa tawng hmang thiam tak, thil sawi thiam, thil chik mi tak, thil chhui peih, titi thiam, fiamthu thianglim thawh tur hre em em, a hun leh hmun a ngaihtuahna seng (Presence of Mind) zung zung thiam a ni. Tin, Zai hi a ngaina in zai hrui te a thiam em em a, dikna duh mi, hleihlenna leh eirukna do tlat mi a ni. Thudik ni a a hriat chu huai taka sawi chhuak thin mi a ni. Pathian a tanga chhuak thudik ni a a hriat te ngawihbo pui mai theilo mi a ni. Chhung leh khat, u leh nau, thenrual te huikhawm leh ngaihsak, Mizo tlawmngaihna vawng nung duh mi, a kova awm hlenchhuah ngei ngei tum tlat mi a ni.

## **THU LEH HLA LAM A SULHNU TE.**

Thusawi mi leh nuam ti em em a ni a, zai pawh nuam a tiin Solfa a thiam tha in Solfa Training pe in a chhuak fova, Hmawngchuan Unit TKP, Shillong Unit TKP leh Shillong Bial TKP ah te a lehkha zir chhung zawngin Zaipawl Conductor ani zel a. Thuziah lamah pawh Kohhran Chanchinbu hrang hrang leh College Magazine leh Souvenir hrang hrang ah thu a ziak hnem hle. Tin,



‘Seminar Paper’ buatsaih a thu sawiin hmun hrang hrang ah hun a hmang tawh a ni. A hun lai ang zel a thiamna leh hmasawna te rawngbawl na atana hmang tangkai leh thiam tak niin a in tuaithar peih a, hmasawna lo awm zel rual a ke pen turin a inbuatsaih thin a ni. Lehkhabu rotling tak tak hi Paruk lai a ziak hman a, India ram leh Mizoram a Computer leh Internet a rawn lar chhoh laia a ziah “Computer Zirtirtu (2001)” pawhin mite ngaihhlut a hlawh hle a, a lehkhabu ziak pakhat “**Savun Kawrfual**” chu kum 2017 khan Mizo Academy of Letters ten kum khat chhung a Mizoram a Lehkhabu chhuak zinga tha ber an thlan chhuah thin ah thlan a ni a, ‘Mizo Academy of Letters - Book of the Year 2017 Award’ a dawng a ni.

### **A Lehkhabu Ziah te.**

- |   |           |
|---|-----------|
| 1. Hla Ropui te leh a phuahtute                         | 1998/1999 |
| 2. Computer Zirtirtu                                    | 2001      |
| 3. Hmasang Kohhran Chanchin                             | 2004      |
| 4. Chhandamna tluantling chang turin Pianthar a tawk lo | 2004      |
| 5. Savun Kawrfual                                       | 2017      |
| 6. Mizo Buanpuite                                       | 2021      |

(Heihi la tlangzarhloh ani a, engkim peih fel vek tawh a ni a, a dam loh tak avangin a tlangzarh hman ta lo a ni)

## A HUN TAWP LAM.

Field Director, North India Mission Field hna a chelh chu a term hmang zovin Mizoram lamah Tlabung Pastor Bial enkawl turin kumin 2021 khan sawn (Transferred) a ni a, a hna zawm tur a an in sawn hma in Covid 19 Hripui thawh hnihna (Second Wave) chuan nasa takin Delhi a tuam a, vanduaithlak takin anni chhungkua pawh he hri hian a man ve ta a, hri vei te natna lanchhuah dan chi hrang hrang – Khawsik, khuh te an neih avangin April 17, 2021 khan a hmasa ber atan a sample test a ni a, mahse engmah an hmu lova, an damloh danah hmasawna a awm thei lova, a vawihnihna atan April 23,2021 ah an thisen an endik tir leh a, chutah pawh chuan Covid 19 hri an la



hmu leh ta chuang lova, an chhungkua hian an damlova, an fate erawh chu mahni inbuaipui thei siin an awm a, an khawsik leh khuh, thaw hah, taksa na te a reh theih loh avangin April 26, 2021 ah a vawithumna atan an nupa in an sample test tir in Damdawi in an pan leh a, heath hian Covid 19 hri chu an hmu ta a, an taksa a hri in hna a thawh te a lo nasa deuh tawh bawk nen taksa chhung enna khawl (CT Scan) in an han enchiang chu ‘Awmna’ natna (Pneumonia) alo nei nasa in chu chuan a chuap a lo khawih tan tawh a lo ni a, chumi ni chuan Indian Spinal Injury Centre ah an in dahlut ta nghal a ni.

Tarlan tawh angin Hri in a chuap leh Lung te a lo khawih nasa in thawk lamah harsatna a lo nei chhova, April 29, 2021 atang in Oxygen pek a ni a, hma a sawn chho hret hret a kan hriat laiin May 13, 2021 ah a dinhmun hniam lehin ICU ah Ventilator hmanga enkawl a ni a, hemi zan hian Plasma Therapy pawh pek nghal a ni. Nasa taka tawngtaina nen, mihring thiamna tinreng nen a enkawl a; dam leh mai tur a kan beisei lai leh a dinhmun pawh hmasawn hret hret ni a kan hriat laiin May 29, 2021 zing dar 4:00 ah a thawhrimna kalsan in natna leh lungngaihna awm tawh lohna hmun min lo pansan ta a ni.

## **LAWMTHU:**

Rev. Lalhmingchhuanga Zongte damlohna chungchang ah hian a rawngbawlpui te leh hotu te, Delhi Mizo Welfare leh Delhi Mizo Inkhawm, Indian Spinal Injuries Centre, New Delhi-a thawkte leh Mizo Nurse leh Doctor amah ngaihvena enkawl tu te, Delhi-a Mizoram Sawrkar hotu te, BCM Shalom leh Mission Vengthlang YMA leh Local Level Task Force te chung ah Rev. Lalhmingchhuanga Zongte chhungte leh Mizoram Baptist Kohhran Puipa ten lawmthu kan sawi tak meuh meuh a. Tin, hmun hrang hranga a chanchin hria-a alo dam theih nana thahnemngai taka tawngtaisaktu te leh tawngtai mai piah lama sum leh paia tanpuitu te zawng zawng chung ah lawmthu kan sawi a ni.

-----XXXX-----

## **ENGE AN SAWI?**

*“Kan Missionary leh Pastor duhawm tak, Rev. Lalhmingchhuanga Zongte hi BCM Hqrs. Office, Mission Staff zawng zawngte leh Mission Field-a Missionary zawng zawng ten zahna chibai kan buk a. Kan sunin kan ui takzet a ni.”*

- Rev. Dr. C. Vanlaldik,  
AGS-Mission, Baptist Church of Mizoram

*“Pathianin Fa sawm min pe a, Valpuia (Rev Lalhmingchhuanga Zongte) hi chu a puitlin hunah pawh Pathian rawngbawl tura Sawma pakhat atana kan hlan anih hi”*

- Upa Siamhleia Zongte (F/o Rev Lalhmingchhuanga Zongte)

*“Rev Hminga, Kan va ui che em! Nangmah hmangaiha i ruanghlawmtu tur û leh nau, chhûng leh khat te nei tho mah la, Pathian rawngbawl i ngaih pawimawh avanga i hmangaih em em Mizoramah 'lu nghahna tur mahni in leh lo' nei lova damchhung ni i chhiar zo hi ka va ngaisang tak che em! Ram leh khawtlang, chhungkua leh kohhran i vei ang hian tunge rawn vei chhonzawm ta ang le! I chawimawi thin Pathian ngei chuan a chawimawi ve ta che a ni e. Hei hi ka sawifiah thiam dan che a ni: 'Pathian ruat Pastor' tiin. I kalsante Lalpan awmpui zel rawh se.”*

- Rev. K. Lalnunsanga,  
Regional Director, Guwahti Region

*“Kum 2020 ah rawngbawl turin Delhi kan lut ve a, chutah chuan Pu Hminga te nupa hi lo lengin, tawngtaina nen min lo lawm thlap a ni. Lâwm tha pawh kan sût hmâin hripuiin min run a, kan tawm tlang chu a ni ta mai a. Phone in kan inbia a, lengah te kan insawm ðhin. Mahse 'keini hi kan fimkhur zual nge ni, kan tawm tlat mai a ni' tiin min chhang mai ðhin.*

*Kumin hian a post thar lamah an kal mai tawh dawn avangin April ni 9 khan kan va leng a, dawhkanah chuan a lehkhahu ziah thar, la release loh 'Mizo Buanpuite' tih chu a lo dah a, ka mit a la hle mai a. Min pe ve ta nghe nghe a, inlamah chuan kan chhiar a, hripui avanga fimkhura lo tawm mai mai a lo ni awzawng lo, mi tamtak tana malsawmna ni turin lehkhahu ðatak hi a lo ziak reng a lo ni. Amah hi awm tawhlo mahsela, he lehkhahu hian a chhiartu zawng zawngte nunah eng ang takin nge thu a la sawi dawn tih hi hriat phak rual a ni lo.*

*Amah nen hian ðum tam kan la inkawm lo. Kan hun hman dun reilote atanga a mizia ka hmuh chu, Pathian thu hum leh mahni ideology puan chhuah kawnga mi huaisen, thu duna titi kawnga innngaitlawm leh thuhnuairawlh si a ni. Mihring nuna awmkawp har tak, huaisenna leh innngaitlawmna nei kawp tlat a ni. He lehkhahuah hian a ideology pawimawh tak tak a lo inphûm tlat a, tuarna kara tangkai tur thu ða tak mai a lo ziak a, ama chanchin nen hian a inhmeh hle mai. Tuarna leh thihna a lo thlen hian "mihring chuan a chhan a zawng a, Pathian erawh chuan a rah a zawng a ni" tiin. Ani ang pastor chhuanawm tak a kalta mai hi engnge a chhan kan tih mêk laiin, Lalpa erawh chuan a rah a lo en a, he thihna hmang hian a siamtu leh asiama chu chawimawiin a lo awm ta a ni.*

*Amah uitute thu ziak tam tak chhiar tur a awm a, chuta pakhat ka chhiar phei chuan heti hian a ti a, 'engatinge mi heti zat hian pastor pakhat damlo kan tawngtai dam theih loh' tiin. Mahni lam indem khawp hiala amah uina thu a ni. Mahse hemi chungchang pawh hi a lehkhahuah hian a lo chhang sa vek a "kan duh leh dil ang diak diaka chhanna kan hmuh loh hian kan rinna chu a nghing ta em ni? Ni lo ve, kan dil ang chiah chiaha thil a awm kher loh pawha Pathian rin zelna hi rinna ropui zawk a ni" tiin. Hei hian a rinna nghehzia a tarlang chiang hle a, amah mai ni lovin a nupui fanaute pawh he harsatna avang hian an nghing lo va, a tawp thlengin rinna leh beiseina nung an vuan tlat a ni. He Pathian chhiahhlawh tlawm leh ropui tak si thlahnaa thu ka sawi ve thei hi ka lawm hle a ni.”*

*- Pastor H. Lalhmingmawia, Delhi Mizo Presbyterian Church.*

*(Delhi Mizo Inkhawm in Sunna Hun, Zoom Meeting May 30, 2021-a buatsaih a thusawi atanga lak chhuah a ni e.)*

*“Vala nen hian Shillonga inhria kan ni a. TKP kan hruai ho thin a, zaipawlah kan teldun a, chanchinbu kan buatsaih ho thin a, thu kan ziak dun thin a, nula kan rim dun satliah a ni lo va, curfew bawhchhia meuh pawhin kan inzui chhuak zing hle. Khum khatah rizai inzawnin vawi duai lo kan mu dun thin a, a thlum a al ei za tak meuhin kan inkawm thin. Rawngbawlna huang zawhin kohhranah kan thawk dun leh a; mahse, kan inthlau hle. Ka teh dan mawlmang tak chuan kei hi litre 10 dawng ni ta ila, Vala chuan litre 50 a dawng ang.*

*Ani chuan a Pathian thu zir hi pastor nan ringawt hmang lovin Mizoram tan a hmang ti ila, a theihna sanzia kan sawi tumna lamah mi dang rilru ka hliam ang tih chu ka hlau deuh. Mahse a thianpa hian niin ka hre tlat. “Kan Mizona kristianpui lova kan kristiansan atang khan kan nun leh kan Kristianna inkarah ramri kan kham...(Savun Kawrfual) a tih atang ringawt pawh hian hmachhawp, min hruai thlen tumna chu a nei ngei mai tih a chiang. Sawi ringawt lova ziaka a thiamna leh finna Zofate tana bun chhuak duh chhim leh hmara pastor kan neih sawm rual vel lek zinga pakhat a nih hi, Vala hi. Mizo Kristian, kohhran pawl indaidanna bang keu hawnga lawnliaam thei tura ka mi chuam a ni asin maw le.”*

- Upa KMS Dawngliana,  
Editor, Baptist Today & Literature Reader, BCM

.....

## **REV LALHMINGCHHUANGA ZONGTE**

### **SÛNNA**

*Baptist Church of Mizoram (BCM)-in Rev Lalhmingschhuanga Zongte in Missionary ni tûra kum 2016-ah New Delhi-a in rawn tirh khan, keini Delhi Mizo Inkhawm (DMI) te chuan keimahni Kohhran mi leh sa, kan Pastor angin kan lo lawm lût tawp mai a. Kan tan berampu tha leh rinawm niin a hun awl neih zawng zawngah kan mi leh sa, tupawh a mamawh apiangte puiin a hmanhlel thin a. Tunah chatuan ram min lo chansan ta mai hi kan uiin kan sun êm êm a, nangni BCM pawh rawngbawltu chhuanawm in lo chan ta hi kan ui puiin kan sunpui tak meuh che u a ni.*

*Lalpa Isua Krista hmingin Kohhran hote chibai kan bûk a che u.*

Rev Varrosanga  
Chairman, DMI

Lalruatlina  
Secretary, DMI

**REV. LALHMINGCHHUANGA ZONGTE**  
FIELD DIRECTOR, NORTH INDIA MISSION (DELHI)

## **VUINA INKHAWM**

BCM Biak In, Shalom, Mission Vengthlang  
1<sup>st</sup> June, 2021 @ 11:00 a.m



**1966 - 2021**

### **HURAITU**

Rev. LB Khawpuimawia  
Bialtu Pastor  
Mission Vengthlang Bial

### **VUITU**

Rev. Dr. R. Zolawma  
President Elect, BCM

### **THUSAWI**

BCM Aiawh  
Rev. Dr. R. Lalthanmawia  
Executive Secretary, Aizawl

### **Tualchung Aiawh**

Upa H. Lalrochama  
Secretary, BCM Shalom

### **Chhungkaw Aiawh**

Pu J. Zarzoliana &  
Pi Malsawmdawngliani

### **MALSAWMNA**

Rev. Dr. H. Lalthlamuana  
Vice Principal, AICS

### **THLAN MUALA TAWNGTAI**

Upa K. Sanglura  
Chariman, BCM Shalom

*"A mi thianghlimte thihna chu LALPA ngaih chuan hlu tak a ni."*

***Vuina Inkhawm hi BCM YouTube Channel, LPS leh Zonet-ah te Live a ni ang***